

Abstract

Sin fundament da funtaunas orales e scrittas vegn examinà en quest artigel, co che las ideas davart l'omosexualitad èn sa midadas en la societad dapi il davos terz dal 19avel tschientaner e tge maletg da sasezzas che dunnas che aman dunnas sviluppan en il context istoric respectiv. La noziun «omosexualitad» è sa furmada pir en la mesadad dal 19avel tschientaner cun l'entschatta da las ciencias sexualas. Entant ch'ins partiva avant da l'idea che tut ils umans possian exequir potenzialmain acts omosexuals, eran ins ussa da l'avis che unicamain in tschert tip da personas – numnadamain ils omosexuals – vivian la relaziun cun ina persuna dal medem sex. L'omosexualitad era damai per l'emprima giada ina part da l'identitad da la persuna pertutgada. Cun quai han ins localisà l'omosexualitad (sco era l'eterosexualitad) sco ina disposiziun en il corp. L'artigel perscrutescha tge influenza che quest'opiniun aveva da quel temp per amicizias tranter dunnas. En il conturn da l'emprim moviment da las dunnas a la fin dal 19avel tschientaner eran stretgas amicizias tranter dunnas d'impurtanza centrala. Quai è era stà il cas per la Grischuna Meta von Salis ch'era sa liada cun Hedwig Kym en in'amicizia per la vita. A maun da las scrittiras da Meta von Salis pon ins mussar che stretgas amicizias tranter dunnas cumenzavan da quel temp a vegnir suspectadas d'esser da character sexual e patologic. Meta von Salis è sa distanziada vehementamain da quest'idea; ella veseva amicizias tranter dunnas sco in'affecziun nobla e casta.

La nov'idea da l'omosexualitad è sa derasada, surtut areguard las dunnas che aman autras dunnas, pir plaun a plaun en il decurs dal 20avel tschientaner. Uschia èn Marga Bührig e sia amia Else Kähler vegnidas confruntadas en ils onns 1950, ch'eran marcads dal maletg da la famiglia burgaisa, cun lur stadi da dunnas nunmaridadas e betg cun lur furma da viver ina relaziun stretga cun ina persuna da la medema schlattaina. Cura che l'omosexualitad feminina è daventada ils onns 1970 in tema public, ha Marga Bührig cumenzà a s'occupar da questa tematica. Ella è sa solidarisada cun las lesbas dal segund moviment da las dunnas, n'è però betg s'identifitgada cun l'expressiun «lesba», perquai che quella vegniva tenor ella associada memia ferm cun anormalitad e sexualitad.

Per il temp suenter il 1945 avain nus intervistà 26 dunnas che aman dunnas e che stattan en connex cun il chantun Grischun. Ellas èn creschidas si en in ambient social, nua che la sexualitad en general e l'omosexualitad en spezial eran daventadas in tema public. A las dunnas che aman dunnas ha quai dà la pussaikladad, ma era ina pressiun sociala, da sa definir sco omosexualas. Quai s'exprima tranter auter en il fatg che tut las dunnas intervistadas numnan sasezzas lesbas. L'identificaziun cun la noziun «lesba» sa basa dentant sin experientschas cuntradictoricas. D'ina vart spetga il conturn da las intervistadas ch'ellas confessian lur «vardad interna» resp. «lur disposiziun». Da l'autra vart considerescha la societad anc adina l'eterosexualitad sco la norma sociala, e svalitescha

l'omosexualitad resp. collia quella cun associaziuns negativas, quai che fa l'identificaziun pli greva.

L'artitgel renda visibla la diversitad e cumplexitad da l'affecziun e l'amur tranter dunnas. Ins vegn conscient che dunnas che aman dunnas vegnan percepidas e definidas a moda divergenta, tut tenor il context istoric, e ch'ellas sviluppan perquai differents maletgs da sasezzas. Sin fundament da las funtaunas orolas sa mussa che l'idea da l'omosexualitad sco identitad, ch'è sa fatga valair a la fin dal 19avel tschientaner ensemen cun las scienzas sexualas, è sa derasada considerablamain a partir dals onns 1970. Il medem mument ves'ins però era quant fräschla ch'è quest'idea; era entaifer ina generaziun resp. entaifer in temp istoric specific n'exista nagina chapientscha unificgada d'ina identitad lesbica. Ultra da quai na considereschan las dunnas intervistadas betg lur identitad lesbica sco identitad unica, mabain sco ina part da numerusas autras fassettas d'ina identitad cumplexsiva.